

այրին մէջ՝ ուր էր Մանուկը իր մսուրին մէջ գրուած, կեցաւ Անոր գլխուն վրայ, և տեսան մոգերը ու հովիւները երկրպագութիւն ըրին Անոր: Այդ խորհուրդին պատճառաւ՝ լոյսով կը մտնենք եկեղեցին և կը կատարենք տօնը»:

Անվաւեր գրոց համաձայն՝ կ'աւանդուի նաև թէ աստղը ունէր փոքր տղու մը ձեւը, իր վրայ ունենալով խաչ մը և որ խօսած է մոգերուն հետ (Bru. էջ 100):

Ուխտաւոր հայ քահանայ մը 1711 - 1712 ընտանեօք ուխտի կուգայ Երուսաղէմ և իր ուխտագնացութիւնը գրի առնելով կը յիշէ պատմական և աւանդական դէպքեր: Ս. Ծննդեան աւանդութեան մասին ալ ունի սա տողերը. «Եւ Ծննդեան (վանքին) վրայ ղուրշին ղափլը, և սորա մէջտեղը սիւն մի և ի գըլուխ սեանն մեծ աստղ մի շինած, որ ի գալն մոգուց թագաւորաց աստղ անդ դադարեր է, նորա համար նշան գալն եղեալ են եւ վերայ ի ղուրշինն յիսուն եամիրախ է» (Բագ. 1868, էջ 118):

Մոգերուն եւ հովիւներուն երկրպագութիւնը. — Նոր Կտակարանի անվաւեր գրոց մէջ «Մոգերու երկրպագութիւնը» ընդարձակօրէն գրուած է. «Վասն գաղղսեան մոգուցն ընծայիւք յերկրպագութիւն նորածին Մանկանն Յիսուսի» ԺԱ. գլուխէն կը քաղենք մոգերու մասին ինչ ինչ հատուածներ. «... Ահա մոգք յարեւելից՝ որք ելեալ էին յաշխարհէն իւրեանց եւ բազում զօրօք եկեալ հասեալ նոցա ի քաղաքն Երուսաղէմ գամիսս ինն, և էին թագաւորք մոգուցն երեք եղբարք ի միասին: Առաջին թագաւորն Մելքոն էր Պարսից, երկրորդ թագաւորն Հնդկաց Գասպար